

上海史料叢編

寒 圩 小 志

上海市文物保管委員會編

一 九 六 二 年

上海史料丛編簡例

一、丛編所輯为上海地方历史文献資料，以稿本及旧抄本为主，包括流傳不广的重要刊印本。

一、为了保存文献，編輯工作仅限于对所选各著解題、书跋、断句或分段，間作必要的按語之外，概不进行注釋、考訂、校勘及增补工作。

一、排印用簡体字。其中有些是代用字类，如「徵」之于「征」、「廠」之于「厂」等，則改采繁体字，以免古今異义。

一九六一年七月上海市文物保管委员会

弁言

光緒甲申仲秋。耒訪吳孝廉介眉於張溪。孝廉出寒圩小識見示。謂耒曰。莊生仁錦。余婦之從子也。居寒圩王司農故址。是編蓋得於其鄉楊氏故篋中者。相傳爲楊小厓先生原本。子其爲莊生序之。耒受而讀之。欣然起曰。是小子之責也。夫昔人著述所存。苟有述及祖德。誦及先芬者。必汲汲焉求之。至求之不得。而忽覩其書於若存若亡之餘。其忻喜過望。必遠過於常情。耒少時見無名氏之書。知五世祖玉輝府君曾館王氏秦望山莊。與諸君聯九老會。而他書無徵。聲銷灰燼。盡然傷之。今讀是書。而玉輝府君之小傳在焉。玉輝府君之官銅陵也。黃宮允之雋贈以詩。見唐堂續集。在銅陵建與言堂。黃解元淮有記。見銅陵縣志。又嘗建省心義學。見府君所著谷水舊聞。是書稱其品學並勵。則府君未爲司訓時。久已爲後進矜式。而宦績之光於義安。非操之有本不致此。抑耒重有感焉。府君館王氏時。在康熙季年。王氏尙富厚。邃宇重樓。璇題耀日。今何在哉。耒聞司農當日不滿於鄉評。使其樹德於鄉。其子姓何至零落乃爾。古人云。積金於子孫。子孫未必能守。其司農之謂乎。而邢氏、楊氏亦稱望族。甚勢力不逮司農。何一轉瞬而亦聲華闕寂也。天道茫茫。往復不盡。耒家亦中落矣。始讀之而欣然以喜。繼思之而愀然以悲。耒惟願與孝廉各勉以善。而尤願莊子之力於善。他日昌大其門。使寒圩復成壯邑。其所爲必有大過於司農者。豈不足增志乘之光。而爲一鄉重哉。婁縣章耒次柯謹序。

丁未歲春。錫初次往寒圩。謁外舅莊水鄰先生。獲聞當日王氏之盛。今秋藹然內阮寄示寒圩小識一編。披閱之餘。更嘆人文之盛。不獨王氏然也。惜見已晚。不及采入郡邑志。適郡城章韻芝明經館於張澤徐氏。轉乞爲序以歸之。序所云力於善。以昌大其門。復成壯邑者。願內阮輩交勉之爲望。光緒十年八月中秋日。吳昂錫謹識。

寒圩小志目次

章序	四
吳序	五
寒圩圖	七
界止	一
分野	二
風俗	二
田賦	三
田數	三
免科	四
恩蠲	四
徭役	五
水道	六

橋梁	八
兵防	九
坟墓	一〇
寺院	一〇
古蹟	一一
科目	一三
文學	一六
倜儻	二二
苦志	二四
能詩	二五
技術	二七
獨行	二八
節孝	二八
流寓	三〇

釋道	三三
祥異	三四
雜志	三七
跋一	三九
跋二	四〇

寒圩小志

界止

自吳子壽夢築華亭爲行獵之所。而華亭之名以始。唐天寶時屬吳郡。隸江南道。大歷年屬浙江道。宋屬浙江嘉興府。明屬南直縣。清屬江蘇布政司松江府。

寒圩屬華亭縣仙山鄉七保四區。爲三十圖、三十一圖。鄉曰仙山。以數里南有山。爲查道成學仙處。故名曰查山。又曰仙山。三十圖爲寒字圩。三十一圖爲天字圩、月字圩。統名曰寒圩。以地雖一隅。人烟湊集。衣冠文物。一時稱盛。商賈往來。交易不絕。依然一市會焉。遂名曰寒字圩鎮。載在邑志。其界止東爲陳涇。西爲寺浜。爲高家涇。南爲洞涇。北爲前岡。中則彭家涇。爲兩圖之分界也。北至府治四十五里。南至金山衛十八里。東至柘林三十里。西至金山倉署涑涇鎮二十里。

王司農却非建山莊於此。庭園花木。極一時之盛。其西十餘里有秦望山。登山而望。可見園庭。因名曰秦望山莊。又名其地曰秦望鎮。

分野

天地至寥闊也。寒圩乃滄海一粟耳。何言分野。然一民一物。何一不在丕冒之中。故志之。華亭古揚州也。斗宿分野。自漢以來。史書記載微有不同。然皆不離乎斗宿。爲星紀之次云。

風俗

民興於仁。士奮於學。縉紳錄所載。爲一邑言也。寒圩亦庶幾近焉。

清初時有菩提菴僧云。秋夜乘涼。推窗玩月。聞東則王氏。西則邢氏。南則楊氏。北則盛氏。讀書之聲。環繞不絕。

其民勤於耕。遊手好閒者。昔則有之。今鮮有存者。其女勤紡織。疋布可售六七百文。不特貧者藉以餬口。卽稍有家者。亦資以利用焉。其疾病輕醫而重巫。其氣習尙力而仗義。一人踴躍。衆輒從之。其地宜稻。故米常有餘。而賈客不絕。其節序。元旦拈香畢。卽向本宗賀節。初二日賀隣里。初三日自近及遠。以相往來。十五夜作粉團以祀竈。大者六個。名稻顆圓。以祈年豐。以稻草燒田中曰燒田蠶。祈虫豸之不生也。又或紮紙燈遊里巷。凡人物花果器玩之形。無不悉備。清明以草汁作

粉團。曰青龍圓。以供祭祀。有到墓野祭。剪紙錢以掛之。謂之標墓。又有迎神賽會。觀者如堵。十月朔亦如之。端午則角黍相遺。七夕則瓜果乞巧。中秋節設月餅。陳新果。獻時花。焚降壇曰上天香。極其誠敬。重九則剪紙爲旗。新粉作糕。以祀竈神。冬至則於小除致祭。臘月祀神曰臘土地。除夕則放爆竹曰封門炮。歲朝曰開門炮。此先彼後。終夜不絕。如是蓋三日云。

田賦

明隆慶三年僉事鄭元韶履畝清丈。分爲上中下三鄉。寒圩列在下鄉。

清朝雍正三年、乾隆二年。疊奉恩旨。裁減浮糧。每畝條銀九分七釐。乾隆四十六年修築海塘。加徵五釐。今一錢零二釐。漕米每畝一斗二升二合七勺有零。

田數

三十圖寒字圩一千三百八十四畝零。

三十一圖天、月字圩二千三百五十畝零。

免科

鄉學基在三十圖寒字圩口口號二分七釐。

義塚在三十圖寒字圩一百四十一號二畝。

三十一圖月字圩八十五號二畝二分四釐一毫。二百號三分八釐九毫。

汛地在三十一圖月字圩三百口口號口畝口分。

恩蠲 緩徵附

乾隆二十年秋災。緩征漕米。

二十一年蠲免本年地丁銀。

二十四年水災。緩征銀米。

三十二年蠲免漕糧。

三十三年蠲免積欠。

三十六年蠲免地丁錢糧。

四十三年蠲免地丁銀。

四十六年蠲免漕米。

五十五年蠲免錢糧。

嘉慶二年蠲免銀米。

五年蠲免漕米。

十九年夏秋旱災。被災者免漕十分之一。餘緩征。

二十三年蠲免八年分至二十二年止積欠。

二十四年秋旱災。緩征。

道光二年夏旱災。緩征。

三年夏秋水災。蠲免十分之五。

徭役

寒圩爲海濱腹地。別無差使。惟前明徵漕糧。民收民兌。設糧長一。當此役者。其家立破。

清朝康熙年間設水次漕倉。官收官兌。小民便之。數百年積弊。一旦全除。仰見朝廷予惠黎民之意。茲所有事者。開河築塘而已。

河道自東江填塞後。水從北來。勢緩易淤。自濬自河。猶日不暇給。又加龍泉港、鹽鐵塘等。動輒協浚。民力不堪。乾隆三十二年。士民盛懋仁等具呈頂濬自河。除運石欽工之外。概不協濬。歷蒙上憲准詳勒石仙山道院。民力以蘇。

海塘舊制載府縣志頗詳。乾隆四十六年知縣林培由修築。以七保各圖派築土塘。著爲例。官又不惜其民。憑吏胥上下其手。如每歲歲修。定例十二月興工。三月報竣。今則乘四月農忙。出差催築。于時民方布種。無暇到工。差人藉端勒索。有種田一畝。私費至二三百文者。業主則循業食之例。亦有加派。習以爲常。書吏保甲藉爲利藪。海人藉此代工。而小民之苦無可告訴。深有望於有司之惜民瘼者焉。

水道

潮水向從東南海口由滌缺而來。卽古之東江也。後以海溢不時。倭寇屢至。議填塞之。水由黃浦經張澤塘、褚宅涇泥塘灣。至太前岡。入陳涇。後泥塘灣淤。從鄉界涇入前岡。及鄉界涇淤。從張涇入小前岡。入王坎涇。後張涇又淤。從潘涇入前岡。不及數年。潘涇又淤。有金邑孫茂昌者。農人也。仗義請開張涇。連浚二次。家傾而工竣。今蒙其利。志此以見一隅之地。歷著變更。桑田滄海。

理益信焉。

前岡爲三十圖北界。西由張涇而來。東通亭林。其北岸則有鄉界涇、橫涇。爲十八圖境。寺浜爲三十圖西界。其西則金邑也。水由前岡南入。稍轉而東。經邱家灣。出高家涇。

柳頭涇在寺浜東。亦前岡南入。稍轉而西。與寺浜合。經邱家灣。出高家涇。

陳涇在柳頭涇東。爲兩圖東界。亦由前岡南入。南通白茅涇。東岸則爲過胥塘。爲小閘港。爲大閘港。西至王坎涇。

留名浜東接陳涇。南出高家涇。

高家涇。據府志。南至裏河塘。北過前岡。爲潘涇。按此有楊家港。自牛橋港起。南至裏河塘。北過王坎涇。略轉而西北。爲高家涇。爲留名浜。出陳涇達前岡。是楊家港、留名浜。皆高家涇也。今兩旁蕩田廣闊。塘岸高爽。逢轉折處。漾口低田幾十畝。決無疑焉。自王坎涇南。爲三十一圖東界。北爲西界。

橫港東接陳涇。西通留名浜。今東口已淤。

彭家涇在橫港南。東接陳涇。西達高家涇。爲兩圖分界。宋時有大族彭姓者居此。故名。今子孫猶有存者。惜皆農人。上世莫考。

倉間河北接彭家涇。轉東而北。又東爲施家港。出陳涇。

王坎涇西由張涇而入。東通大閘港。北爲陳涇。南爲白茅涇。

牛橋港在王坎涇南。又名南橫港。西由張涇而來。東出吳灣涇。

洞涇在牛橋港南。東接楊胥鋪。西通張堰鎮。爲三十一圖南境。

新紹涇北接王坎涇。南通牛橋港。出洞涇。爲三十一圖西境。

橋梁

德興橋石梁。前在關帝廟南。王司農移建在今處。跨陳涇。楊小厓有陳橋玩月詩云。湖光月色兩相凝。直上危橋第一層。林樹梢頭浮碧彩。荻蘆洲裏淡漁燈。憑欄不覺衣沾露。環眺依然興欲騰。咫尺敞廬歸未晚。片心前在玉壺冰。

震龍橋石梁。跨陳涇。盛氏所建。在盛宅東。故名。震龍後爲僧傳峯掘樹跌斷。東堍至今損壞。菴亦從此不振。

長壽橋俗名橫港橋。石梁。亦盛氏建。道光元年里人重建。

王西橋跨留名浜。崇禎間王西橋建。以字爲名。石梁。道光五年冬蔣坤揚等重建。

前岡橋跨前岡。

佛閣橋在文昌閣後。跨彭家涇。坍去四十餘年。乾隆壬辰（三十七年）楊小厓遷住橋西重建。

西匯橋跨彭家涇。

楊家橋跨彭家涇。向有木柵。列在縣冊。楊旭思建。

鳴鶴橋今名太平橋。木頂石塊。莊金擲更建。

王坡涇橋向爲木橋。嘉慶二十二年里人蔣坤揚募建。石梁名衆安橋。

衆善橋俗名牛橋。明王建宇建。乾隆年間石壞易木。嘉慶十四年秋。有失足跌死者。里人傷之。重建石梁。後□□年張庖九重建。改名佑善橋。

兵防

寨字圩汛。金山營右哨頭司把總管轄。汛兵九名。在三十一圖。其界止東至陳涇。西至張涇。南至南橫港。北至前岡。把總駐劄亭林。